

LA CJARGNE AI CJARGNEI

Las monts ai montagnui

Lu è dit clar e tont ai 2 di dicenbar dal 1823, fovelant da l'Americhe, il president dai Stâz Unîz Min Monroe: l'Americhe ai Merecans! O crôt che il stes edentic discors, in piçul, al vadi benon ancje par nô tes robis ch'a nus riguardin. Pecjât mo che la storie di cheâtris nus vêti siervût dome a cjapâ cuatris a scuele e la nestre dome a cjapâ pidadis in tal cûl e a sierâ i voi.

Pussibil che no vêtin inparât propit nuje?

Il furlan (e il cjargnel, ch'al è simpri chel), cuant che si trate di difindi ce ch'al à fat sù cui siei sudors lavorant di un scur al âtri, fieste e disdevore, nol viôt plui nuje.

Al cjape in man la forcje e al è risolût a sbudielâ il prin ch'j capite sot des grifis. Murî ma no cedi! Cuant ch'a si trate, invessit, di difindi la sô tiere, lis sôs monz, lis sôs valadis, nol bassile. Tant, a jè robe di duc' e dinissun! Chest individualisin che lu à in tal sanc e che lu à rionzût cu lis teoriis todescjs dal secul passât, ai riscje, se nol ganbie, di struncjâlu dal dut.

No jè une novitât che chî di nô i foresc' (todescs e talians) a son vignûz dome a roseâ. Cuant ch'al ere di lâ a distirâsi, dopo passûz e inbeverâz, a lavin in altrò. Cumò a son diventâz inmò plui sfaçâz: a vuelin vignî achî di nô a fâ la digjestion midiant ch'ò vin un cuadrel restât cance ne fabbrichis ne diaui. A cjapin i bêz là che ur comude e a decidin, daûr che ur semèe, di vignî a svernâ in Friûl e in Cjargne cence nancje insumiâsi ch'a vegnin in cjase di un âtri e che, amancul par creance, a varessin di domandânus par plasê e s'ò sin contenz di vêju. Cumò e àn pierdude ancje la creance. A vegnin di parons e nô si tirin da bande par lassâju passâ. Ur din il nestri lòdar e si tirin in tun cjantan a osteâ. Ma cui ese colpe di chestis robis?

O sin colpe nô

Prin di dut o sin colpe nô. No stin a lâ masse lontans. Se lôr a vegnin chî parons espotics, al vûl di ch'a san di biel inprinsipi che nô o sin sturnei.

Parcè, difat no vano a Bolzan o in Valdoste?

Ano pore di lassâ la plume? E nô, no sino autonomos come chei dal Tirol di misdi e chei ch'a fevelin francês? Purtrop, i talians e àn di vê nulît che i furlans a son bogns dome di lavorâ e di fâ i fameis e alore nus dan lavôr. Come fameis che ben s'intint!

Dopo di nô (o prin), a vegnin i pulitics nostrans, che cheâtris o savin che no si scomponin per nô. Parcè ju vino metûz sù? Par che nus vendin ai foresc'? No par l'ostie! Ju vien metûz par ch'a nus detin une man a difindi ce che la nature o la storie a il diaul e so mari nus àn dât e no par dânus vie ance nô. I pulitics a varessin ai savê che jentrâ in coumun o in regjon nol è un lusso, ma une crôs; un sacrifici e no une trasêf (grèpie). Mi semèe che un sindic o un assesor o ancje un simplic conseîr al vares di jessi come un cjan di vuaite: pront a cjapâ pai sghirez duc' i laris ch'a cirin di jentrâ in cjase a puartâ vie. Se un cjan nol vuache o ch'al è vuarp e stupit, e alore al è miei metilu da bande, o ch'al cognos il lari e al à di vê vût cualchi vues di scuindon e alore nol fâs sunsûr. In duc' i doi i câs al è un cjan di traj cu la sclope. Amancul fevelant di cjans!

La porcarie dal pas di Pramuel

La porcarie dal Pas di Pramuel no j'è ne la prime ne, purtrop, la ultime. A fâs dome part di un plan ben studiât di colonizasion foreste in Friûl e in Cjargne. Esal mai pussibil che un avocat di Trevîs, pajât pulît dal guvier par ch'al

cjati fûr il mût di juda il svilup dal nestri teritori, al decidi, cussì, par cont so, di vendilu a di un privât? E nô, ch'o varessin di jessi i parons, o vin di stâ a cjalâ? E l'aministrasion cumunâl le vino metude sù par ch'a nus meti in place? Cuan vino stât, nô, a fâ sù baracons jù par Vignesie o Rome o Triest par lâ in sferis? Magari nô no vin dirit di lâ in sferis parceche il mus al à dome dovês, mai diriz!

I soliz filibustîrs a tirin fûr che chest mût di svinidrî chel ninin di bon che nus e restât al jude a risolti il problema de disocupazion. Balis! Parcè no vegnino mai a proponi chî di nô cualchi fabriche? Slachjal il taren? No sino bogns di lavorâ? O lin pur ben par netâ pavimenz e par netâ i fruz dai siors e par quartâur lis valîs. Massàris e fameis, come simpri! Cert che la femine dal sindic di Pontebe no larà a lavâ i plaz lassù sul Pas par cjapâsi un franc; e nancje il vicesindic nol larà a spalâ nêf par tirâ indenant la famèe. No an dibisugne. I puesc' di lavôr ch'a saltin fûr di chest tipo di svilup a van ben dome pai biâz e pai stupiz e i plui furbos a cirin fûr puesc' di lavôr par cheâtris.

Zà cualichi an, un gno amî nol cjatave plui il gjat. Une besteone, ch'a veve dal uman. A sparì a colp. Cîr di cà, cîr di là, la bestie, no saltà fûr âtri. Si sintive, sì, un odor strani in cjase, ma cul timp si usarin ancje a chê puce fastidiôse e dopo no sintirin plui nuje. Cuan ch'a tramudarin cjase e a spostarin il spolert, a cjatarin une robe sute e dure come une suele di curian. Al ere il gjat.

Timp o tart, al vignarà il moment che ancje i nestris cjapons locâi e «nasionâi» a varan di tramudâ, parcè che l'ecès nol à durade e si lu sa il cjaldîr al al gire, al gire ator ator dal cercli fin ch'al reste dome il cempli. Cuissà tros gjaz fraiz ch'a saltaran fûr in chê volte? Pecjât che, a fuarce di nasâ robe fraide, si fâs il cal a dut e no si bassile plui di nuje. Chest al è il mal pardabon!

antoni beline

23 di Fevrâr dal 1976